

USEN USIO ISOP
Leviticus 16:1-34; 23:26-32
QYQH QKPEP-ŊKPQ 86

Eke Mkparawa

IKQ IBUOT: “Jehovah ada idiok ido nnyin kpukpru odorị enye ke idem” (Isaiah 53:6).

Enyaña Oto Ke Iyip

Usuñ kiet ikpōn odu emi owo ekemede ndibọ edifen ke mme idiok-ŋkpọ esie: ebe oto ke Iyip Jesus. Jesus ọkọdọhọ ete: “Koro emi edi iyip Mi, eke ediomị, emi eduokde ebaña ediwak owo, man efen mme idiok-ŋkpọ mmọ” (Matthew 26:28).

Ke ini Ọbọn nnyin okodude ke isọn, Enye ama odu uwem eke eyede onyūn ekpep mme owo usuñ nte mmọ ekpedude uwem edieke mmọ eyomde ndika Heaven. Edi baba owo kiet ikemeke ndinam mme ukpep-ŋkpọ Esie ibọhọke efen enọ enye ke mme idiok-ŋkpọ esie enyūn emen mmọ efep ebe ke Iyip Andinyaña. Ndien nnyin inyene ndinam mme ukpep-ŋkpọ emi, midighe ntre, nnyin idisañake isim Heaven. “Edieke oyomde ndiduk uwem, nim mbet” (Matthew 19:17).

Mbemiso Jesus ọnyọn aka ke Heaven, Enye ama etiñ ọnọ mbet Esie ete, “Ediwak ufok edu ke ebiet Ete Mi; edieke mikpedighe ntre, ńkpọdọhọ mbufo; koro mmọn ńka ńkotim itie nnim nnọ mbufo” (John 14:2). Kere baña ndusuk ndiye ebiet emi afo okutde ke ererimbot emi, nyūn ti ete ke Jesus ama ọdọhọ ete ke Heaven eye akan ke usuñ emi nnyin mikemeke ndikere mbaña. Kpukpru nnyin imoyom ndika Heaven ńkoduñ ke ediye ebiet oro ke nsinsi.

Edisana Ebiet Ana Ọnọ Ndisana Owo

Edieke Heaven edide utọ utibe ebiet ntre, Abasi idiyakke mme anam idiok-ŋkpọ eduñ do. Kpukpru mmọ emi ekade Heaven enyene ndisana, emi eyetde ke Iyip Jesus. Ke ini John Edima okodude ke Isuo Patmos, emi ekebinde enye efep ke ufok esie, koro mme idiok owo mikoyomke enye ọkwọrọ abaña Jesus, enye ama okut ńkukut. Enye ama okut ediwak owo esinede mfia ọfọñidem, ye ndak eyop ke ubok mmọ, ke ekwọ ekanare Ebekpo Abasi. John ama ekere mme mmọ emi edi mme anie. Kiet ke otu ndisana owo ke Heaven ama etiñ ọnọ John, “Mmọ oro edi mmọ emi eketode ke akwa ukut ewọñọ, ekenyūn eyetde ọfọñidem mmọ enam afia ke iyip Eyen-erọn” (Eriyarare 7:14). Ema enyaña mmọ eto ke Iyip Jesus: ntak edi oro ọfọñidem mmọ ekedide mfia, ndien mmọ ekeme ndikwọ itoro nnọ Abasi ke Heaven.

Uwọrọ-Ufin Eke Spirit

Jesus ndiduok Iyip Esie ke ntak mme idiok-ŋkpọ owo edi se ekotde Usio-Isop. Oto ke Usio-Isop, efen ke mme idiok-ŋkpọ nnyin enyūn emen efep ke nsinsi. Ke ini nnyin ididade ke iso Abasi ndinam ibat ke abaña usuñ nte nnyin ikodude uwem ke ererimbot, nnyin idiboroke mbume ke abaña mme idiok-ŋkpọ emi nnyin ikanamde ke mme usen edem edieke nnyin ikebeñede Jesus efen onyūn emen mmọ efep.

Eti nte ndusuk owo ifiokke ite ke akana nte Jesus akpa man osio isop mme idiok-ŋkpọ nnyin. Mmọ ekere ete ke utom Esie mi ekedi ikpikpu koro Enye ikowukke Obio Ubọn Esie mi ke isọn, nte mme owo ke ini oro ekekerede ete ke Enye eyenam. Nditọ Israel (Mme Jew) ekedu ke ufin ke idak mbon Rome ke ini Jesus okodude ke isọn, ndien mmọ ekeyoyom Andinyaña emi edidide ndidi Edidem mmọ, edinyūn ọbode ukara mbon Rome. Edi Jesus ikedighe ndinam oro. Enye ekedi ndiduok Iyip Esie man eyet mme idiok-ŋkpọ owo efep. Ndibọhọ idiok-ŋkpọ nnyūn mbeñidem ndika Heaven edi se ikponde ikan ndiduñ ke emem ke isọn.

Akwa Ekọm-Urua Erifak

Kere baña ekọm-urua emi Jesus ekekpede man afak nnyin osio ke mme idiok-ŋkpọ nnyin! Enye ikanamke baba idiok-ŋkpọ kiet; Enye okodu ye Abasi ke ini ekenamde ererimbot, “Ndien mitoho ke Enye, inamke ńkpọ baba kiet eke ekenamde” (John 1:3). Kpa ye oro, Enye ama onyime ndikpọn ediye ebiet-iduñ Esie ke Heaven nnyūn ndi ke isọn ke mbiet owo, odu uwem, onyūn ọbọ ufen nte nnyin (inamke baba idiok-ŋkpọ kiet), onyūn ekpe ekọm-urua ufak nnyin ke ndiyak Uwem Esie nnọ ke idiok mkpa ke krọs. “Edi enye akada unan abaña mme idiok ido nnyin, anuaha abaña mme ukwañ-ŋkpọ nnyin: ufen odoro enye ke idem man nnyin ikut emem; ndien inia esie ọkọk nnyin” (Isaiah 53:5). Nnyin imokut ke ufañ ńwed oro ite ke imonyūn inyene eńwọñọ erikok oto ke Usio-Isop. Peter afiak etiñ abaña eńwọñọ emi ke ini enye ọdọhọde ete: “Enye ke Idem Esie obiom mme idiok-ŋkpọ nnyin ke ikpohidem Esie ke eto, man nnyin ikpakpa ikpọn idiok-ŋkpọ, inyūn idu uwem inọ edinen ido. Nde unan Esie enam udọñọ okure mbufo” (I Peter 2:24).

Usen Usio-Isop Nditọ Israel

Abasi ama oyom ndiwut Nditọ Israel se Usio-Isop ediwọrọde, mmọdo Enye ama osio usen kiet onim ke isua ke isua emi ekedade mme uwa edi, emi okowutde utom emi Jesus edinamde ke ndiyak uwem Esie nnọ nte odu-uwem uwa. Mmọ ekeduok iyip ke mme uwa emi mmọ ekesiwade kpukpru usen, kpukpru emi, ke usuñ kiet mme eken ekedi mbiet ñkpọ emi Jesus edinamde ke Iyip Esie emi ediduọhọde. Edi ke Usen Usio-Isop, ama odu mme saña-saña uwa, emi okotimde owut odudu emi Iyip Jesus edinyenede. Mme uwa emi ekedi ke abaña ofuri idut, emi owutde ete “owo eke amade” ekeme ndibọhọ. Edi ke abaña mme idiok-ñkpọ eke idem mmọ kiet-kiet, mme owo ekena nte esuk eda uwa idiok-ido edi. Kpa ye oro, nnyin ikemeke ndibọhọ nto ke eñwọñọ Christ ete kpukpru ererimbot ekeme ndibọhọ, ibọhọke nnyin kiet-kiet idi ye erikabare esit inyuñ ibeñe Jesus efen ọnọ nnyin ke mme idiok-ñkpọ nnyin. “Koro Abasi akamama ererimbot ntem, tutu Enye osio ikpọñ-ikpọñ Eyen emi Enye obonde ọnọ, man owo ekededi eke ọbuotde idem ye Enye okutak, edi enyene nsinsi uwem” (John 3:16).

Usen Usio-Isop ekedi usen emi ọyọhọde ye uteñe, emi Nditọ Israel eketide mme idiok-ñkpọ mmọ. Mmọ ekenyene ndifiok nte ke ata eti inemesit iduhe ibọhọke efen ke mme idiok-ñkpọ mmọ. Nnyin ikemeke ndinyene ata idara ibọhọke eyet mme idiok-ñkpọ nnyin oto ke Iyip Jesus.

Akwa Oku Ikpọñ

Nnyin imọfiok ite ke Aaron ye nditọ esie ekedi mme oku, edi Aaron ekedi akwa oku. Enye ikpọñ akanam utom ke Usen Usio-Isop kpa nte Jesus, Akwa Oku nnyin. Enye ikpọñ okosio Isop idiok-ñkpọ nnyin. Enye, “Ke Enye ama akama utom erinam owo esana ke mme idiok-ñkpọ, Enye ọsuhọre etetie ke ubok nnasia Andinyene ubọñ ke enyọñ” (Mme Hebrew 1:3). Aaron ama ekpeme eti-eti ndinam kpukpru ñkpọ ukem-ukem nte Abasi eketemede enye. Enye ekesine saña-saña ọfọñ ke usen emi, enye ama onyuñ eyet idem esie ediwak ini man otim ọfiok ete ke imọ imasana, emi edide mbiet edinam asana.

Usuñ Edibe Nduk Ke Ata Edisana Ebiet

Ikanaha nte baba owo kiet oduk ke Ata Edisana Ebiet, ke ebede akwa oku ikpọñ, ndien enye ekenyene ndibe nduk ke Usen Usio-Isop ikpọñ. Kere se emi ọkọwọrọde ọnọ enye ndimenere ikpehe nnyuñ nda ke Iso Abasi emi okodorode ke Itie Usio-Isop. Aaron ama ada ebok ikañ ke Censer o-gold esie ye ufuọñ-ñkpọ ndifọp, emi edinamde nsuñikañ odu ke ufot esie ye Abasi, “man enye okukpa mkpa.” Enye enyene nditiñ enyin nnyuñ nsaña ke ido ukpono ke ini enye ebinede Abasi. Abasi oyom nnyin idi ke Iso Esie ye ifiok nte ke Enye edi edisana. Ana nnyin ikpono Ufok Abasi, inyuñ ikama idem nnyin nte imọfiok ite ke Jesus ke esese nnyin kpukpru ini. Ke ini ibọñde akam, ana nnyin ifiok ite ke nnyin itiñ ikọ ye Andibot nnyin, kpa Enye emi akanamde enyọñ ye isọñ ye kpukpru se iyọhọde ke esit. Kam kere se ọwọrọde nnyin ndinyene utọ ifet oro ndibọñ akam nnọ utọ edisana ye utibe Abasi emi, inyuñ ibọ iborọ ke mme akam nnyin!

Ema esiwa ebọt iba saña-saña ke Usen Usio-Isop. Aaron owot kiet onyuñ ada iyip esie oduk ke Ata Edisana Ebiet man osime ke Ñkpọ-itie Mbom ke abaña mbio obio. Nditọ Israel ikekemeke ndiduk ñka do ke idem mmọ, edi Aaron ama anam uwa emi ke ibuot mmọ.

Se nte mmọ ekekerede ke ini mmọ ekebetde Aaron ndiwọrọ ndi! Mmọ ekeda ke aña enyuñ ebọñ akam ke ini enye okosimede iyip ke Ata Edisana Ebiet. Mme oku eken ikekemeke ndiduk ke Edisana Ebiet, ebiet emi itie uwa gold ye uwuk-utuen-ikañ gold ekedude, ke ini Aaron odude ke Ata Edisana Ebiet. Mme ñkanika gold emi ekeyirede ke nyeriye ọfọñ Aaron ema emia ke ini enye akasañade, emi ama otim anam mbio obio emi ekedude ke aña efiok ete ke enye ke odu uwem, ke onyuñ anam uwa usio-isop onọ mmọ.

Ikpehe Asiaha

Ke ini Jesus akakpade ke krọs, ikpehe Temple ama asiaha, man kpukpru owo ekeme ndibe nduk ke Ata Edisana Ebiet. Oro ọwọrọ ete ke nnyin kpukpru imekeme ndika ke Ñkpọ-itie Mbom ke idem nnyin inyuñ iyomke oku ererimbot nditiñ ikọ nnọ Abasi ke ibuot nnyin. Ke ini Jesus ama okokure utom erifak, ama okunyuñ ebe oduk ke Heaven ndidi Akwa Oku nnyin ke Ata Edisana Ebiet ke Heaven, ufọn ikoduhe aba ndinyene oku mme ndikpono Abasi ke ido emi ekesinamde ke ataya.

Akwa Oku Nnyin

Jesus ikebehe iduk ke Heaven ye iyip enań ye eke ebọt, nte Aaron okodukde ke Ata Edisana Ebiet, edi Enye ọkọnọ Iyip Esiemọ. Ke ini ekekońde Enye ke eto, ema ekim Enye ubok, ukot ye ñkañ Esie, ndien Iyip Esie ama ọduọhọ ndisio isop mme idiok-ñkpọ nnyin. Ke ini Enye ama ekekpe utọ ekọm-urua oro ọnọ nnyin, afo emekere ete nnyin imekeme ndisim Heaven ke usuñ efen ke ebede usuñ emi Enye okonimde?

Jesus eyefiak edi ọnọ mmọ emi eyomde Enye. Nte Nditọ Israel eketiede ebet Aaron ndiwọrọ ke Efe-Esop ndi, ntre ke nnyin ibet Jesus ndisuhọre nto Heaven ndi nditañ ikot Esie nnyoń ye Enye. Enye ọkọdọhọ ete ke iyefiak idi ndida mmọ emi etiede ebet Enye.

Nditie mbet Jesus ọwọrọ didie? Ana nte etebe nnyin ikpe ebe ke Iyip emi Enye ọkọduokde. Ana nte enam nnyin isana, esio ndammama uduot idiok-ñkpọ, emi ñko ebe ke Iyip Jesus. Ndien, ana nte nnyin inyene Baptism

Edisana Spirit. Ke ini Jesus ọkọnyọnde oduk ke Heaven, Enye ama ọnwọhọ ọnọ mbet Esie ete ke Imọ iyenọ Iberedem, Edisana Spirit, ndidi Andida nnyin nduk “ke ofuri akpanikọ.” Jesus ama eteme mbet Esie ete ebet tutu “esine mbufo odudu emi otode ke enyọh” (Luke 24:49). Item emi enyene nnyin nko mfin emi. Nnyin inyene ndisaña ke ofuri uñwana Ikọ Abasi emi ayamade ke usuñ nnyin, man idu ke mbeñidem ndisobo ye Jesus ke ini Enye edidide.

Andibọ Ufen Owo Efen

Akana ewa ebọt iba ke Usen Usio-Isop. Nnyin imokut ite ke ema ewot kiet enyuh eda iyip esie eduk ke Ata Edisana Ebiet. Ekekot ebọt eken ebọt-ikpat. Ndusuk ini nnyin isikot owo, ọbọ-ufen-owo-efen ke ini enye obiomde ndudue owo efen. Ata akpa ebọt-ikpat akanam emi. Enye akada suh ke ini Aaron odoride ubok ke ibuo ebọt oro onyuh ayarade mme idiok-ido nditọ Israel odori enye. Ndien enye, ke idem esie, asaña ye owo emi akadade enye aka ke akwa akai-ikot, ebiet emi enye osopde. Baba owo kiet ikekwe ebọt emi aba. Oro edi mbiet Jesus, emi okonyimede ndidi ke isoh, emen mme idiok-nkpọ nnyin obiom ke Idem Esie, onyuh akpade man emen mme idiok-nkpọ efep ọnọ kpukpru mmọ oro ebinede Enye ye esit eritua mkpofik ye erinim ke akpanikọ.

Mmọdo nnyin imokut ite ke Usen Usio-Isop, nnyin imenyene oyoh ndise emi Jesus akanamde ke Enye ndinyime ndisuhore ndi ke isoh ndiduok Iyip Esie man oto do efen mme idiok-nkpọ nnyin, enyuh emen efep, man ekuti mmọ aba enọ nnyin.

MME MBUME

1. Nso ke Usen Usio-Isop akanyan ubok owut?
2. Anie owo akanam mme uwa onyuh anam utom ke Efe Esop ke usen emi?
3. Nso ke enye ekekeme ndinam ke usen emi, emi enye mikekemeke ndinam ke ini efen?
4. Nso mbeñidem ke enye akanam ke idem esie man oduk ke Ata Edisana Ebiet?
5. Nso ikedi ebọt-ikpat?
6. Nso ikotibe inọ ebọt eken?
7. Didie ke mme ebọt emi ekeda enọ Jesus?
8. Didie ke nnyin ikeme ndibọ erifen ke mme idiok-nkpọ nnyuh nnam emen mmọ efep?